

# INUIT ATAQATIGIIT

## Inatsisartuni



UKA20/49  
18.11.20.  
Peter Olsen

**Aningaasalersorneqarsimasunik aallakaatitassianik nutaarsiassanik, maannarpiarlu soqutigintunik imallit tusagassiutit aallakaatitsisinnaanngornissaat anguniarlugu inatsimmut atuuttumut allannguutissatut siunnersuuteqarnissamut Naalakkersuisut peqquneqarnissaannik Inatsisartut aalajangiiffisassaattut siunnersuut. Aallakaatitassianik nutaarsiassanik, maannarpiarlu soqutigintunik imallit aningaasalersorneqarsimanerat, aningaasaliinermut tunngaviusimasoq suungaluarpalluunniit, aallakaatitsinnginnermi tunisisup kinaassusaanik takutitsisumik nalunaarutigineqartarnissaa piumasqaataassaaq.**  
(Demokraatit Inatsisartuni gruppiat)

Demokraatit inatsisartunut ilaasortaataa siunnersuutaanut qujalluta, matumuuna Inuit Ataqatigiinniit imatut oqaaseqaateqassaagut.

Tusagassiutini suugaluartunilluunniit; naqitatigoortuuppata, radiokkoorpunga, TV-kkorpataluunniit, tamarmik immikkut ittumik inuiaqatigiinnut pingaarutilerujussuupput, inuiaqatigiinnilu pingaarutilerujussuarmik inissisimaffeqartuullutik.

Nunatsinni tamat oqartussaaqataanerannut tusagassiutit qitiulluinnartumik, pingaaruteqarlunnartumillu inissisimaffeqarput.

Tusagassiorfiit tassaapput politikerit politikikkut aaliangiussimasaannut tunngatillugu isornartorsiuisussaataasut. Politikerit tusagassiutitigut oqariartuutissatik pilerinartunngorlugit saqqummiukkumasarpaat, politikerillu taamatut oqariartuutiginiakkaminni suna siunertarineraat, anguniarneraallu tusagassiutinit qulaajarniarsarinqartarpoq. Taamaammat tusagassiutit nunatsinni tamat oqartussaaqataanerannut pingaarutilimmik inissisimaffeqarput.

Pissaanerup pingasoqiusatut agguarneqarsimanagera nalinginnaasumik oqallisigigaangatsigu, tassani eqqarsaatigikkajuttarpagut; Tassalu inatsisiliortut (inatsisartut) inatsisunik malinnitsitsisussat, tassaallutik naalakkersuisut aammalu pingajuattut eqqartuussisussaataasut tassalu eqqartuussiveqarfimmiut.

Aamma oqartoqartarpoq tusagassiutit tassaasut, pissaanerup pingasoqiusatut aggoneqarsimasup pissaanerit sisamaattut. Tusagassiorfiit, pissaanerup sisamaattut inissisimanermikkut, pissaanerit taakku pingasut ajunngitsumik ingerlanersut nakkutigisussaavai.

Taamaattumik pingaaruteqartorujussuuvoq tusagassiorfiit suugaluarunilluunniit, eqqortumik ilumoortumillu tusagassiisarnissaat; naatsersuutigineqarsinnaanissaat, tatigineqarsinnaanissaat, upperineqarsinnaanissaallu; naqisimaneqaratik qanorluunniit oqarsinnaatitaanissaat aammalu arlaannulluunniit attuumassuteqaratik tusagassiisnaatitaanissaat.

Tassalu uagut Inuit Ataqatigiinniit pingaartilluinnagarput, tassalu tusagassiorfiit tassaasasut arlaannaanulluunniit attuumassuteqanngitsut, kiffaanngissuseqarlutik naqisimaneqaratillu qanorluunniit oqarsinnaatitaasut.

Nunanut allanut qiviarutta, nunat allat ilaanni tusagassiorfiit aningaasaliisartunit – suliffeqarfissuarnilluunniit aningaasalersorneqarlutik, tassa imaappoq sponsorerneqarsimallutik tusagassiorfiit ingerlanneqartarput.

Assersuutigiinnarsinnaavarput ullumikkut USA; USA-mi tusagassiorfippassuarnik ulikkaarpoq; naqitatigut, radiokkut, TV-kkullu. Amerlanerpaartaallu minnerusumik annerusumilluunniit aningaasaateqarfinniit, suliffeqarfissuarninngaaniilluunniit aningaasalersorneqarlutik ingerlanneqarput. USA-mi tusagassiorfipparparujussuarnik assigiinngitsorpasuarnillu sammisallit soqutigisaqartullu; Talerpilliunianik tapersersuisut, saamerliunianik tapersersuisut, upperisarsiortunillu pingaartitsisut il.il.

Nutaarsiassat, maannakkorpiarlu soqutiginartunik imallit aningaasaliiffiqarsimasut – sponsorerneqarsimasut ilisarnaatigikkajuttarpat aningaasaliisorisimasaminnik nuannaajallatitsinissaq, ajuallatitsinaveersaarnissarlu. Aningaasaliissuteqarsimasup soqutigisaatut, nuannarisaatullu ingerlatsinissaq, sammisaq, avammullu tusagassiutiqineqartoq ilumoonersoq ilumuunnginnersulluunniit apeqqutaatippallaarnagu; aningaasaliisartut siunertaa kissaataalu apeqqutaaginnarpoq pingaarnerpaallunilu. Nutaarsiassat taamaattut ilumoonersoq ilumuunnginnersulluunniit nalilersoruminaassinnaasarput, apeqquserneqarsinnaasarlutillu.

Ima oqaruma kina eqqaassavisiuk?: FAKE NEWS! FAKE NEWS! FAKE NEWS!

Aap, soorunami Donald Trump; USA-ip præsidientia, qanittukkut USA-mi qinersisoqarmat ajorsarneragaasoq, 20.januarimilu 2021-mi Joe Bidenimit taarserneqartussanngortoq.

Tusagassiorfiit imminik apeqqusissut, isornartorsiuisullu tamaasa Fake News-uneraluarlutik suaartaatigai; tassa imaappoq sallutuujuneralugit eqqunngitsuliortuunerarlugillu unnerluutigalugit suaartaatigalsimavai.

Allaat uunga killisimalluta, Donald Trumpimik tapersersuisorpasuit akornannit upperineqalersimavoq, allaat tusagassiorfippasuit inuppassuarnit upperineqarunnaarsissimallugit.

Tassa massakkut USA-mi pissutsit assersuutitsialanngorsimasutut ipput, tusagassiutinut aningaasalersorneqartartunut tunngatillugu; uppernassutsip tatiginassutsillu apeqquserneqarnera. Tamannalu ugornarpoq ajuusaarnarporlu.

Uagullu Inuit Ataqtigiinniit tamaanga killikkusunngikkaluaqaavut.

Sponsoratit, aningaasaliisartut suulluunniit nutaarsiassaqaqtitsinermut, soqutiginartulluunniit pillugit aallakaatitassianut akuutinngilluinnarnissaat Inuit Ataqtigiinniit aalajangiusimassarput, nutaarsiassaqaqtitsineq soqutiginartunillu imallit avataaniit sumilluunniit aningaasaliiffiqartussaangimmata.

Taamatut siunnersuuteqarneq, nutaarsiassaqaqtitsinerup soqutiginartunillu imalinnik aallakaatitsisarnerup, suminngaaniilluunniit sunnerneqanngitsumik ingerlanneqarnissaannik innarliiniarnermut aqutissaasutut Inuit Ataqtigiinnit isigaarput.

Tamanna akuersaangilarput peqataaffigerusunngilarpullu; Inatsisartut, partiit aaliangersimasut, naalakkersuisulluunniit tassaassanngillat tusagassiutit tungaatigut qanoq ingerlasoqarnissaanik aaliangersaasussat; naamik kikkulluunniit akuliuffiqineqanngilluinnarnissaat kissaatigeqaarput.

Siunnersuut manna eqqarsarnarpoq, isumaliornarporlu. Siunnersuut manna takussutissaanerpa uppernarsaataanerpaluunniit, ullumikkut naalakkersuisooqatigii aqutsiumavallaalersimanerannut, matoqqasumillu ingerlatsivallaalersimanerannut? Neriuppunga taamaattoqassanngitsoq;

Illuatungaatigulli kiffaangissutsip nunatsinnut uterteqqinneqarnissaa Inuit Ataqatigiinniit kissaatiginerungaalerparput.

Suliassarlu pingaarneq tassaalersorinarpoq KNR-ip nukittorsarluarneqarnissaa; Aap KNR-mi tusagassiortut nunatta sinneranut aammalu nunarsuup sinneranut angalasinnaasariaqaralarput, misissuiartorlutik, paasisassarsiorartorlutik, tusagassiiartorlutillu, inuiaqatigiinnut tamatsinnut qaammarsarneqarnissamillu pisariaqartitsingaartunut, qaammarsaanikkut iluaqutaasussamik.

KNR-ip nukittorsarneqarneratigut nunatsinni tusagassiortoqarneq pitsanngorsartigu nukittorsartigulu; KNR-ip arlaannaannulluunniit attuumassuteqarani, pituttugaananilu tusagassiisinaanera pitsanngorsartigu nukittorsartigulu; tusagassiortut alapernaatsut, misissuisinnaasut, itisiliisinnaasut apeqquusiisinaasullu nunatsinni nukittorsartigit pilersitsigillu.

Demokraatit inatsisartunut ilaasortaatitaasa taamatut siunnersuuteqarnerat, nutaarsiassaqaartitsinerup soqutiginartunillu imalinnik aallakaatitsisarnerup, suminngaaniilluunniit sunnerneqanngitsumik ingerlanneqarsinnaaneranik innarliiniarnertut Inuit Ataqatigiinniit isigaarput.

KNR-ip pitsanngorsaavigineqarnissaa nukittorsarneqarnissaalu uagut Inuit Ataqatigiit peqataaffigerusupparput. Taamaammat.....

Taamatut oqaaseqarluta, Demokraatit inatsisartunut ilaasortaatitaasa siunnersuutaat aammalu Naalackersuisut allannguutissatut siunnersuutaat tamaasa Inuit Ataqatigiinniit itigartippagut.

Qujanaq

Peter Olsen  
Inuit Ataqatigiit